

— 542 —

fachen, wie die genant sint. Vnd sullent alle wette vnd bezzerunge besten vnd beliben, in desselben schultheizzen hant, ane aleine die schulde vnd bezzerunge, der man spricht des herren hulde, wer die verwürket, die sol an vns sten, nach den dingen als ez von alter herkomen ist, ane geuerde. Derselbe schultheizze sol vns ouch einen gelerten liplichen aid sweren zuo den heiligen, daz er ein rechter gemeiner richter si, richen vnd armen vngeuarlich, vnd daz er vns alle vnser recht vestiflich vnd genzlich halte vnd tuo, vnd ouch die künde vnd melde vnd vns gehorsam si, wartte vnd diene, als das ouch von alter hartkomen ist, ane geuerde. Wirdet ouch neman ze Fr i b u r g rechtlos, dem sullen wir noch vnser amptlüte von vnsern wegen vf sin guot nicht vallen, noch sich des vnderziehen, ez si Denne, daz er rechtlos si worden vmb einen todslag, oder vmb welich sache er den tod verschuldet, so sol er vns ze bezzerung geben zehen phunt phenning, friburger münzze, ist er aber rechtlos worden vmb den blütenden slag, so ist er vns veruallen ze bezzerunge fünf phunt derselben phenninge. Durch daz ouch die egenante stat vnd die burger ze Fr i b u r g von vns vnd den vnseren geschirmet werden, vnd in stetem friden vnd gemache beliben, vnd ouch vnser land vnd lüte von in gesterket sin, vnd rat vnd hilffe gewinnen, haben wir verheizzen vnd gelobt für vns vnd vnser erben, vnd geloben ouch genediglich an disem briefe, daz wir dieselben stat ze Fr i b u r g, noch chein recht oder nuge die wir da in der stat haben, niemer vs vnsern handen vnd gewalte lazzen, noch emphrömden sullen, weder mit verkouffen, mit versezzen, mit geben, mit wechselfn, noch in dhainen andern weg, sunder wir vnd vnser erben sullen die egenante stat mit allen wirdden, rechten, nutzen vnd zuogehörungen, zuo vnsern handen selber innehaben vnd besizzen, ewiglich, ane alle geuerde. Duch sol cheiner der burger oder der sezzhaft ist ze Fr i b u r g, nicht für vns phantber sin, wan wir si damitte sunderbar begnadet vnd gefrhet haben. Wan ouch die vrogenant stat gelegen ist gegen vnsern landen ze Swaben, darumbe sezen wir vnd wellen, daz si ewiglich